

iExpropiese! vs iConstruyamos!

Skirbi pa Clyde Harms



E luna aki ta haci 60 aña cu pueblo di Venezuela a lanta contra Perez Jimenez y a caba cu su dictadura. Como ami tabata na Caracas e siman cu e revolucion a tuma lugar, semper m'a keda interesa den e historia di Perez Jimenez.

Algun hende a puntra mi con mi ta compara su dictadura cu e dictadura cu ta existi na Venezuela actualmente. Ata algun comentario breve. Mescos cu e dictadura actual, e dictador Perez Jimenez tambe a actua cu man duro contra e dicidentenan y tabata mantene orden cu represion sangrienta y cu prison preventivo sin huicio. Pero contrario n'e dictadura cu a yama su mes Socialismo del Siglo 21 cu a resulta un fracaso tristo y cruel, e dictadura di Perez Jimenez a laga atras un legado di exito com-

ercial, financiero, administracion gubernamental, infrastructural, cultural y educacional.

Cu e grito di iExpropiense!, Chavez y despues Maduro tambe, a expropria y caba cu hopi industria y a causa desempleo asina grandi cu mas di 2.2 miyon Venezolano a emigra pa



Las Torres del Silencio di Centro Simon Bolivar na Caracas tabata e edificionan mas halto na America Latina

busca nan suerte otro caminda. En cambio, Perez Jimenez su politica tabata iConstruyamos! y a crea tanto empleo cu mester a recluta mas di un miyon hende di diferente parti di mundo, especialmente di Europa.

Hopi historiador ta expresa nan admiracion pa tur e obranan grandi cu a wordo ehecuta durante e tempo relativamente cortico di e dictadura di Perez Jimenez. Den un articulo na 2011, e revista "Paréntesis Crítica" e dictador Perez Jimenez a dedica su mes na transformacion di henter Caracas y modernisa e resto di e pais.

E avenidanan principal di Caracas ta legado di e epoca perezjimenista. Entre e obranan di su Gobierno ta destaca te dia di awe: e Centro "Simon Bolivar" cu e edificionan "Las Torres del Silencio" cu tabata esnan mas halto di America Latina tempo cu nan a wordo construi. Ciudad

Universitario cu ta contene Universidad Central di Venezuela (UCV) cu UNESCO a declara patrimonio di humanidad pa su splendor arquitectonico; e Autopista Caracas – La Guaira, e distribuidor di trafico "El Pulpo", e brug General Urdaneta cu ta crusa Lago di Maracaibo, e Teleferico di Avila, y hopi mas.

Berdaderamente, e lista di obranan t'asina largo cu no ta keda espacio aki pa nan tur. "Paréntesis Crítica" ta calcula cu tur e Gobiernonan hunto cu a sigui Perez Jimenez no a haci tanto pa infraestructura di Venezuela. Y e prijs di petroleo durante e epoca di Perez Jimenez tabata apenas 26 a 28 dollar pa bari.



E autopista di Caracas pa La Guaira

Talbez e diferencia ta sinta den e inteligencia y preparacion scolastico di e lidernan. Perez Jimenez a gradua di scol militar cu e cijfernan mas halto den historia y te awe su record no a wordo kibra.

Nicolas Maduro su educacion pa chauffeur di bus no por tabata mucho y na Cuba nan a siñ'e comunismo, pero e no tin e preparacion pa maneja un pais manera Venezuela. Tin hopi historiador cu ta opina cu e Gobierno actual probablemente t'esun mas inepto cu Venezuela a conoce,



iConstruyamos!

< Continua di pagina 18

ademas di ta e mas corrupto.

Durante tur e añanan di Perez Jimenez, e dollar tabata bal 3.30 Bolivar, y apesar di un economia fuerte, no tabatin inflacion. En cambio, e historia di e bolivar desde cu Chavismo ta manda, ta un castigo p'e Venezolanonan. E bolivar a baha di balor asina tanto biaha te cu e dia di awe un dollar ta bal mas di 18 mil bolivar y tin un hyperinflacion di alrededor di 1000%. Asina tanto biyechi di placa mester wordo usa cu ni banco nan tin suficiente.



E teleferico di Avila y e hotel Humboldt, obranan di Perez Jimenez a bira atraccion turistico grandi.

E industria petrolero di Venezuela, e pais cu e reserva mas grandi di petroleo, t'asina mal maneha cu awendia tin racionamento di gasolin y automobilistanan mester para oranan lar-

go den fila pa haya apenas 35 liter. Hopi biaha gasolin ta caba y e automobilistanan mester core di un lugar pa otro pa haya un stacion cu si tin. Naturalmente e ora ey e mester para den fila largo atrobe.



E brug over di Lago di Maracaibo tabata esun di mas largo di mundo.

Tempo di Perez Jimenez esaki no tabata conoci. Como Gobierno ta obliga e panaderianan bende nan productonan na un prijs bou di e lo ke a costa pa traha nan, masha panaderia a sera of nan ta bende solamente ora cu nan logra di haya un lote di hariña na un prijs especial. E resultado ta cu hopi biaha no tin pan n'e panaderia. Un columnista a skirbi cu Venezuela t'e unico pais na mundo caminda un cliente ta yega na un banco y e mester puntra si tin efectivo, na un stacion di servicio e mester puntra

si tin gasolin, y na un panaderia e mester puntra si tin pan. E grito di Socialismo del siglo 21 por wel di ta "No Hay!"

Contrario n'e situacion awor na Venezuela, mescos cu na Santo Domingo den e tempo di e dictador Trujillo, y na Cuba di e Castronan, e cayanan di tur ciudad na Venezuela tabata practicamente liber di crimen durante e añanan cu Perez Jimenez tabata goberna. Por a cana di nochi tur parti di Caracas sin problema. Cu e Gobierno actual, cada 20 minut un persona ta wordo asesina na Venezuela y e pais a bira e di dos mas peligroso den henter mundo. No ta mi intencion di glorifica Perez Jimenez, pasobra e tabata un dictador cruel cu a causa morto di hopi hende cu no tabata di acuerdo cu su politica. E tabata oprimi su pueblo y tambe a kita libertad di prensa. Pero en comparacion cu e dictadura di Socialismo del Siglo 21, Perez Jimenez tabata un genio.

E anochi di dia 23 di januari cu Perez Jimenez a huy pa Santo Domingo abordo di La Vaca Sagrada, el a laga Venezuela un pais hopi mihor cu el a haya 10 año prome.

clydeharms@yahoo.com